



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.14






Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.14



Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.14





Early European Books, Copyright © 2010 ProQuest LLC.
Images reproduced by courtesy of the Biblioteca Nazionale Centrale di
Firenze.
Ald.1.5.14


Ald. 1/6.





Ex Libris Joannis Nenaini
1874





































A D
SISTVM V.

Pont.
Opt. Max.

ORATIO

Aldi Mannuccii,

Habita


in Academia



BONONIENSI

CID ID XXCV

Prid. Id. Maij.



SISTO. V.³
PONT.
OPT. MAX.



N uniuerſa Chriſtianorum omnium laetitia, **SISTE**, Pontifex Max. idemq. Maxime Pontificum, ſilere me, me, inquam, qui & publico nomine omnia Tibi debere plane confiteor, & id perlibenter, omnibus hominibus approbantibus, praedico, & uero priuato Paulli Patris mei tantum Tibi debeo, quantum ne cogitatione quidem aſſequi poſſum, prorsus nefarium eſſe duco. Tu enim ita de eo ſemper ſenſiſti, ut egregium uirum, quae ſumma laus eſt, a Te praecipue proſecta, eum eſſe dices. hanc animi Tui ſententiam cariſſimam ei ſemper fuiſſe, uel illud indiſcio eſt, quod, eo mortuo, in ijs, quae cariſſima habebat, ſcriptis ſcriptum hoc Tuum diligentiffime aſſeruatum compererim. quinimmo & uiuens ſaepiſſime de eo mecum, ſumma utri-

A 2 uſque

4
usque nostrum animi iucunditate, (hanc
enim hereditatem ad me pertinere cense-
bam) colloquebatur. Ceciditq. peroppor-
tune, ut, quo Tu tempore ad Christianae
Reip. administrationem, Tuis singularibus
uirtutibus debitum iam diu praemium, es
euectus, eodem Ego in Tuo aere magis esse
incipiam. Bononiae sum, ut Auitam, Pa-
ternamque, hereditatem aliqua saltem ex
parte tuear. Quod praestare conabor, quan-
tum uires meae ferent: assequarq. fortasse,
Tuo praesertim ductu, Tuisq. auspicijs, Pa-
ter Beatissime. Multa enim latent, quae, ab
Augustis Principibus illustrata, uere illustres
eos reddunt, publicamq. utilitatem, quam
praecipue spectare Principes, quamq. unam
ob oculos habere, debent, maxima eorum
memoriae commendatione, uel maxime
iuant. Ne igitur omnino filerem, uolui
Orationem, quam in ingressu nobilissimae
huius Academiae habui, ad Te mittere. ma-
iora ueteris Paternae, meaeq. obseruantiae
signa in posterum missurus. Ut interim ex-
stet monumentum hoc meum, qualecum-
que sit, in Pontificia Vaticana Bibliotheca,
omnium instructissima. Quae cum a Sisto IV.
cuius

hane
ense.
ppor.
tanae
aribus
m, ci
is esse
a, Pa-
m ex
quan
tasse,
s, Pa-
ae, ab
ultres
quam
nam
orum
xime
uolui
finae
ma-
riae
ex-
m-
ca,
IV.

cuius illustri memoria nedum Roma, sed
uniuersa Italia, recreatur, fundata fuerit, a
Te, qui, nomen Eius referens, uiuam Eius
gloriosarum actionum imaginem a nobis
desiderari hucusque non pateris, neque,
quod boni omnes confidunt, umquam pa-
tieris, incrementum expectat, praestantis-
simo Tuo animo dignum. Faxit Deus, ut,
quae a Te maxima, iure optimo, expectan-
tur, ea quamprimum, ad Christianae Reip.
gloriam, ac ornamentum, perfecta, & abso-
luta, uideamus. Vt, aureo tandem saeculo
restituto, optatam magis antea, quam spe-
ratam, temporum iniuria, felicitatem con-
secuti, felicissimam uitam in terris degamus,
& ad aeternam, caelestemque, planissimum
nobis aditum paremus.

Bononiae. Idibus Maij. CIO IO XXCV

SANCTITATIS. VESTRAE

& Eius praestantissimarum Virtutum,

& propria uoluntate,

& Paterna hereditate,

studiosissimus,

Aldus Mannuccius, Paulli F. Aldi H.



7
MAGNA omnino, uel potius maxima, Vir-
tutis uis est, R.^{me} Prolegate, Illustrissimi
Senatores, nobilissimi que, qui adestis,
Auditores; non minima etiam uis est uel
in sola Virtutis opinione. Id quidem si
mihi antea, aut uestrum alicui, fuisset
obscurum, nunc certe uel haec una ad me
audiendum frequentia incredibilis ita illustre, itaq. per-
spicuum, redderet, ut hac de re nemo praeterea dubitare
posse uideretur. Quid enim uos, uos, inquam, ipsos, in
quibus cum summa, ac multiplici, rerum cognitione mi-
rificum iudicium, cum utroque singularis prudentia, ita
inter se certare, & contendere, uidentur, ut, utra uirtutum
earum ceteris praestet, difficile sit iudicare: quid, in-
quam, uos ipsos ad meam hanc ingenij tenuitatem prae-
sentiae uestrae dignitate, & auctoritate, decorandam,
atque honestandam, adduxit, praeter unicam illam, uo-
bistant opere gratam, sed mihi ad praestandum difficil-
limam, uirtutis opinionem, quam de me aut rumor ip-
se concitarat, aut studium erga me uestrum, ex insigni hu-
manitate uestra profectum, aluerat, & confirmauerat?
Verum Ego, & loci huius amplissimi, & tot, ac tantorum,
uirorum, quos uniuersa & diligit, & admiratur, Italia,
splendore commotus, cum etiam ipse, quid mearum me-
diocritas uirium possit efficere, mihi optime sim conscius,
multo antea copijs ingenij mei perlustratis, si mihi um-
quam Diuinam opem duxi esse implorandam, in aliquo
dignitatis meae discrimine constitutus, nunc illam mihi
uotis, precibusq. omnibus experendam sentio; praecla-
req. mecum actum iri existimo, si tantum mihi, a Caelesti
benignitate, aut ingenij contigerit, aut eloquentiae,
quo non dico integram explere uestram de me expecta-
tionem queam, uerum earum laudum, quae a uobis in-
dustriae meae, nondum re perspectae, plena manu tribu-
untur, tantum promereri, ut neque iudicium in me co-
optando uestrum ab aliquo iure reprehendatur, neque
mea ad hanc suscipiendam prouinciam alacritas teme-
ritatis nomine condemnetur. Non sum enim, non sum
A 4 certe

8
certe ita rerum imperitus, ut huius loci amplitudinem, & meas angustias, aut ignorem, aut, mihi minime ignoratas, non considerem. Vt igitur, quod res est, fatear, haereo, nec labantem animum ulla ratione confirmare ualeo, nisi uestra fretus humanitate. Quantum enim me a dicendo deterret suscepti oneris grauitas, ingenij mei imbecillitas, meritorum nulla fere copia, tantum me recreari sentio singulari uestra benignitate, animumque meum igniculis quibusdam excitari recordationis beneuolentiae, & facilitatis uestrae, indulgentisq. uoluntatis. Quae mihi spem non minimam faciunt, fore, ut uos amoris multo plus, quam iudicij, conferatis ad ea, quae a me breuiter hodierno die dicenda sunt; eaq. omnia aequi boniq. consulatis; animumque inducatis uestrum, non minorem deberi laudem ei, qui uoluntati, ac studijs uestris morem gerat, quam ei, qui cum uoluntate sua maximam, atque ipsa uoluntate maiorem, facultatem praeseferat. Vestri sane in me beneficij magnitudinem optime perspicio. Et, dum eam undique animo recolo, facile comperio, eam a nulla mei animi uirtute, praeterquam a uoluntate, atque erga uos beneuolentia, exaequari posse: doctrinam etenim, aut eloquentiam, si est ulla in me uis eloquentiae, liberalitas uestra longo post se intervallo relinquit: uestrum quouis iudice, & huius, & aliarum facultatum laude praestante. Fulgent enim, in hac auditorum frequentia, ingenij, doctrinae, eloquentiae, prudentiae, lumina, quasi clarissima Bononiae Sidera; quorum splendore Vrbs ista, Solis instar, ceteris aliarum Urbium luminibus tenebras offundere uideatur. Cuius uerissimae laudes antequam a nobis attingantur, nonnulla apud uos dicere decreui: quorum commemoratio, licet uobis superuacanea uideri possit, mihi certe, pro instituti mei ratione, omnino necessaria cenfeatur.

Vetus quidem fuit, & ea communis, sapientium uiro-
rum, opinio, inter omnia, quae a parente rerum Natura
admiratione digna proficiuntur, illud summis esse lau-
dibus efferendum, quod nihil umquam frustra, aut teme-
re,

re, effecerit. cum enim ipsa sit ex optimo deducta princi-
pio, quae diuina mens est, ratio postulare uidetur, ut in-
choata etiam exitu optimo concludat. Cum igitur haec
benigna parens hominem finxisset, & ipsum animans pro-
uidum, sagax, acutum, memoriaq. praeditum, effecisset,
eum, statim factum, pro suae condicione naturae, ad ho-
nestissimum finem cogitationes suas, & facta, iussit diri-
gere. Porro, cum duo essent humani fines, ad quos om-
nis nostra tum actio, tum cogitatio, refertur; alter, qui
in cognitione ueri est positus, alter, qui in optione boni;
hominem quoque utriusque summo flagrare desiderio
uoluit. Insidet igitur, quae insita est, animis nostris sum-
ma quaedam sciendi cupiditas: ad quam quotidie in-
flammandam maximum attulit momentum, atque occa-
sionem, tanta rerum omnium uarietas, tanta naturae
opum copia, tamq. insignis huius Caeli ornatus: in quo
adeo diligens fuit Natura, ut neque necessitati, neque uo-
luptati nostrae, quod amplius requirere possemus, quid-
quam reliquerit. Spectetur hoc, spectetur, inquam, hoc
Caelum, quoddam quasi Naturae ipsius speculum, in quo
tantam cernere est motuum celeritatem, tantam in prae-
cipiti uertigine, & uolutatione, rationem, tantum in
eius luminibus splendorem, ut, quasi suapte natura, tam-
quam magnes ferrum, sic ipsum animos nostros ad se con-
templandum rapere, nedum allicere, uideatur. Elemen-
ta ipsa complectamur animis, tot rerum uarietati obno-
xia, ut sua mole, ac magnitudine, cunctarum rerum mor-
talium materia existunt, & suo ordine, ac serie, aeter-
nam rerum omnium, quae oriuntur, & intereunt, seruant
harmoniam. illa lapides, gemmas, metallorum uenas, gi-
gnunt, herbas, plantas, arbores, animalia tum perfecta,
tum imperfecta, praeterea colorum, saporum, & qualita-
tum aliarum, uarietatem creant. hinc, dulce, amarum;
falsum, insulsum; asperum, molle; durum, tenerum; co-
lore praeditum, ac uacans; perspicuum, obscurum, ex
elementorum admistione generantur. Et, ut multa pau-
cis complectar, ex his omnia illa prodeunt, & coalescunt,
quae aliquando esse coeperunt, & aliquando esse desi-
nent.

nent. quorum in medio homo, tamquam in amplissimo,
 & pulcherrimo, theatro, quasi arbiter, & spectator, col-
 locatus est. Nos igitur, aut tam iniqui, aut tam socor-
 des, erimus, ut, cum tot nobis diuitias, tam praeclaras
 epulas, tam pulchram, atque fructuosam, proposuerit
 Natura lectionem, Endymionis instar, uniuersam aeta-
 tem somno occupati, nihil laboremus? nihil sudemus?
 numquam uigilemus? Vrit ignis, & sua natura summa
 petit, aer ubique funditur, omnia permeat aqua, suo ip-
 sa humore omnia emollit, & terram circumplectens ad
 ima fertur, terra sua se mole sustentat, plantae pullulant,
 animantia sentiunt, collucent sidera, omnia denique da-
 to sibi munere funguntur: nos, ad contemplandum nati,
 lenti sedebimus, & otio torpescemus? Auiculae suos sibi
 nidos parant; aranea telas texit; consulit sibi in hiemem
 formica: nos, homines, tam insignibus bonis, atque ex-
 cellentibus, praediti, desidia languescemus, & graui ue-
 terno oppressi, uitam traducemus? Homo igitur cum sit a
 Natura factus inter omnia animantia nobilissimus, atque
 praestantissimus, uel potius, ut Aegyptiorum, & Chal-
 daeorum, Oracula dixere, felicissimus Hymenaeus, & con-
 iugium, rerum diuinarum, & humanarum: necessarium
 uidetur esse, ut non uni tantum muneri, & operi, sit a Na-
 tura destinatus; neque ad unum tantum finem suas o-
 mnes referat actiones. Ac, quoniam illa actio perfecta exi-
 stimari debet, quae ad optimum finem, atque perfectum,
 dirigitur; credendum est, cum humanae actiones ad per-
 fectissimum finem dirigi omnes debeant, qui quidem est,
 ex Platonis sententia, similitudo, quoad eius fieri po-
 test, humanae cum diuina natura; perfectissimas illas, ac
 honestissimas, esse. At, quae nobilior, quae diuiniore, est
 operatio Contemplatione ueri? in qua princeps ille Pe-
 ripateticorum summam esse positam existimauit homi-
 num felicitatem? Hinc factum est, ut Natura, cum homi-
 nem optaret ad ueritatis cognitionem ducere, sensus tri-
 buerit, ingenium, iudicium, cogitationem, mentem ip-
 sam; ex quibus omnia, quae in rerum natura existerent,
 sub nostram cadere intelligentiam possent. Dispositi ita-
 que

que fuere sensus, ut, quasi quinque interpretes, & nuncij, foribus assiderent: eorumq. praecipui in capite collocati, tamquam in altissima arce: Oculi praesertim, quorum cum uis sit acerrima, uti exploratores adhibiti, ut plus, quam ceteri sensus, ueluti ex specula, possent prospicere. Et, quia rerum odores, exspirantes, ut plurimum superiorem petunt regionem, Nares ipsae in superiori parte collocatae sunt; ut, quae illarum sensui patent, facilius, aptiusque, comprehenderentur: Aures uero, & Os, in perforati Orbis speciem fuere conformata; hoc, ut uocem edere, illae, ut audire non incommodum, possent. In eodem capite fuit Lingua constituta, ut simul epularem uarietatem degustaret, & dentium quodam saepio, & freno, coercita, uerborum copiam, & quasi profluentem, seseq. efferentem, uim frenaret, & illi articulos germanos, distinctamq. formam, redderet. atque ita ex nostra uoluntate, & ratione, usus prodijt Locutionis; quae, cum Eloquentiae suauitate coniuncta, mirabiliter audientes oblectat, animosq. nostros incredibili uoluptate perfundit; dum animi arcana, tamquam uocalis imago rerum, explicat, & ijs, qui audiunt, uelut ea, quae cernuntur, oculis subiicit; & quaecumque animus, rationis ui, diu peruestigata, comperit, aut uera esse, aut falsa, ea ceteris recludit, atque communicat. Sed, quod, dii immortales, artificio Aures ipsae fuere comparatae, atque factae, ut simul emineant, & quasi quodam amfractu, in orbem flectantur? ut & ad audiendum attentius arrigi possent, & uerba diutius retinerentur, quo explicatior illorum esset notio, & intelligentia. Et, ne Natura ulla in parte deesset, prouidit, ut, cum perpetua haec nostra uita esse non possit, expiscari, & indagare, Litteras posset homo in qualibet lingua, unde sapientum uerba, & oratio, chartis consignata, atque litteris, ad omnem aeternitatem commendaretur; nec umquam eorum memoria intermori posset, sed posteris etiam, qui longe abfuturi sunt, lucubrationibus, & scriptis, mirificam utilitatem impartiret. his, amicos alloquimur absentes, non secus, atque si adessent; rerum praeteritarum memoriam,

tamquam

tamquam in thesauro reconditam, conseruamus; leges
 per has condimus, quae uniuersum terrarum orbem
 regunt, & corrigunt; per has Deo hymnos decantamus;
 & bene uiuendi praecepta tradimus; & omnes scientias,
 ab omni saeculorum memoria inuentas, quasi heredita-
 tio iure ad posteros transmittimus. Verum, ut ad uiuam
 hominis uocem, & orationem, mea se conuertat ora-
 tio; per hanc de omnibus quaerimus, sciscitamus, re-
 spondemus: haec disceptat, differit, docet, altercatur,
 consultat, atque decernit. hac una laudantur, & uitu-
 perantur, homines: hac suademus, & deterremus: hac
 defendimus, & accusamus: hac ineuntur amicitiae, foe-
 dera, societates, pacta, conuentus, & hominum commu-
 niones, omnes denique actiones: quae omnia sine ora-
 tione aut minime fierent, aut facta conseruari nullo mo-
 do possent. O suauis, atque benigna, Natura, uere be-
 nigna, atque suauis; quantum tibi de hac tua immensa
 bonitate, & liberalitate, debemus; quantas tibi gra-
 tias agimus; quantisque tua diuina merita praeconijs effe-
 rimus? Tu, optimum summi Dei, atque immortale, in-
 strumentum, tantum hominis decus extulisti, ut nihil
 iam in uniuerso caeli, terraeque, ambitu reperiatur,
 cuius imaginem non referat. ex quo, iure, paruus mun-
 dus Homo uocari solet, quod omnia fere, quae in ma-
 gno sunt, in hoc pusillo eius mundo conspiciantur. Sed,
 ut in orbem quasi propositi reuertar, quid dicendum erit
 de partibus animae praestantioribus, cum tantam indu-
 striam, atque curam, in sensibus Natura defixerit? haec
 autem sunt; Mens ipsa, quae ad rerum diuinarum, &
 principum caussarum, cognitionem inuestigandam est
 tributa; Ratio, quae ex certis, atque exploratis, rebus
 multa colligens, incertis, & dubijs, fidem facit; Ima-
 ginandi uis illa, quae res perarduas, & ea quae interdum
 fieri minime possunt, sic sibi fingit, & proponit, ut
 alios plerumque, seq. ipsam saepissime, fallat, Memo-
 ria, quae omne id, quod aut Imaginatrix animi facultas
 ex plurimis rerum imaginibus expressit, aut illa supre-
 ma uirtus animi, ac mentis, ratiocinando, collegit, id
 omne

omne in se reconditum, atque fideliter asseruatum, opportune nobis exhibet, atque depromit. Quis his mirificus animi facultatum concentus? Qui ordo incredibilis? Quae uarietasiucunda, atque suauis? Sileant ingrati, qui queruntur, & iactant illud suum, Naturam nobis fuisse Nouercam, quae tam breui temporis curriculo, tantis rerum uicissitudinibus, tot fortunae aduersae telis propositam uitam circumscripserit. Ipsi porro ingrati, nisi haec pulcherrima munera, atque dona, perspiciant, nisi Naturam parentem agnoscant; & dementes existimari profecto debent, si feliciorem nobis Ceruum arbitrantur, quod diuitius uiuat; Canem, quod odorandi uilongae antecellat; Aquilam, quod perspicaciori sit acie oculorum; Leonem, quod maiori robore, & uirum firmitate, sit praeditus. Satis profecto, satis ad haec incommoda compensanda uideri debet, quod rationis commoditatem sit elargita, mentis lumen, cognitionem ueri, & summi boni optionem, & adeptionem. Admiremur itaque, querimonijs omisis, beneficia; &, quantum possumus, gratias Largitori agamus. Ceteris Natura animantibus corium, pellem, plumas, squamas, dedit; &, quibus se, suumque corpus, tuerentur, dentes, rostra, ungues, cornua; homini uero corpus exiguum, imbecille, nudum, & inerme, concessit. Nos uero ne propterea tam stultam ueniamus in sententiam, ut suspicemur cariora illi fuisse huiusmodi leuia animalia, conchyliis, atque testudines, homine ipso, omnium rerum in terris dominatore, ceterorumque animantium gubernatore? Ad hoc profecto nati sumus, ut non solum hanc uitam, corpusque, tueamur, aut uoluptatibus perfruamur; sed, ut cum uirtute eam traducamus, illique toti simus addicti. Hinc plus animi nobis tribuit, quam corporis; plus mentis, quam uirium, atque roboris; ut, harum ope, meminisse praeterita, nosse praesentia, & futura prospicere, possemus; immortalitatem nominis praclaris factis, & uirtuti praemium honestissimum, proponens. Ille profecto, qui tantummodo corporis abdomini seruit, animumque turpi otio finit hebescere, similis

lis mihi uidetur homini, qui, cum equorum alendorum studio magnopere delectetur, ei tamen equo, quem, & nobilitate armenti, & pedum uelocitate, omnibus anteponat, maximiq. faciat, clitellas imponat, aut molam in pistrino trudere cogat. Nulla igitur sui parte abutantur homines, aliorum earum officia traduentes, quam quo Natura direxit. Carthaginensem quendam adolescentem, ferunt, cum Leonem a teneris sumpsisset, ita immanem efferatae belluae animum paulatim mansuefecisse, cicuremq. adeo reddidisse, ut iam corroboratus, & grandior factus, Leo, ad omnes usus facile flecteretur. Senatus, iudicio condemnatum adolescentem morte multauit: quippe qui maximo se scelere obstrinxisse uideretur, quod ingenium ferae, & naturalem immanitatem, mutare conatus esset. Quanto maiori supplicio, atque poena, afficiendus uideatur is, qui animum, ad comparandas uirtutes a Natura tributum, a praestantissimo, uereq. diuino, munere abductum, & uoluptatum illecebris delentum, parere sensibus, & in feruire, cogunt? quibus ille datus est, dominus, atque moderator, & princeps? Quare, si homini haec duo spectanda sunt, haec duo quaerenda; boni cognitio, & ueri; quorum in altero scientia est posita, in altro modus, & ratio, uiuendi cum uirtute: credendum est, in utraque summum nostrum bonum, felicitatemq. esse repositam. Haec duo uitae genera, actiui, & cōtemplatiui. sic ab antiquis appellata, duo sunt illa uehicula, & alae, diuini Platonis uoce celebratae, quibus humo surgit nostra mens, & in caelum usque transfertur. haec nobis caelestem beneuolentiam conciliant, & naturae. haec nos in Cuius luce honestos reddunt, amicis iucundos, posteris fructuosos, & per omnes aetates, omnibus linguis, atque memoria, celebratos a uulgi sentina, & a plebis facce, seiungunt. his denique sustentata humana natura, quantum assequi per se ipsa potest, similem se Deo reddere contendit; meditatione Diuinam sapientiam, actione prouidentiam, imitata.

Reliquum mihi est, ut ad huius cognitionis, & scientiae,

15
tiae, excellentiam uos inflammem, honestissimi adole-
scentes, auditores mei. quod praestare contenderem
totis uiribus, nisi mihi esset exploratum, uos, praeclare
ad uirtutem animatos, tamquam ad metam, gloriae sti-
mulis incitari. Solum igitur uos rogabo, atque peream,
quam in uobis ardere uideo, cupiditatem, sitimque, di-
scendi, obtestabor, ut institutum industriae uestrae cur-
sum retineatis, & me ducem, qui me uobis semper aman-
tissimum, atque studiosissimum, praestabo, adeo uestra
diligentia, & attentione, subsequamini, ut neque uos
umquam cohortatione egeatis, nec ullum plane uestri
desiderandi studij locum mihi uideamini reliquisse. Et
fane, inter praecipuas causas, quibus adductus, Pa-
triae commoda, & ornamenta, contempsi, in qua ho-
nestissimo loco eram, apud illos uere Heroes, non mi-
nus Christianae, quam Venetae, Reip. propugnatores;
ut uestris commodis, atque studijs, consulere; hoc uel
primum fuit, quod audieram, Academiam hanc opti-
mis florere ingenijs, qui non solum optime essent ad lau-
dem informati, sed duorum etiam finium, quos superius
commemorauimus, sectatores, & cognitores. Cuius quidem
rei, ne ab uniuersa doctorum hominum sententia discre-
pem, existimo, praeter cetera, Caelum quoque ipsum
praecipuam causam afferre; quod bonorum omnium re-
fertissimam copiam in hanc Urbem diffundere uidetur,
quibus eam reddit, & amoenitate, & pulchritudine, con-
spicuum, & uisentibus iucundissimum; eamq. praecla-
ris ornat ingenijs: quorum uis maxima, in omnis cogni-
tionis, & scientiae, genere, tamquam ex equo Troiano,
semper exstitit. Est enim profecto Bononia, uetustissi-
mum, & honestissimum, omnium uirtutum seminarium,
in sinu Italiae, ut omnes sciunt, constituta, quam undi-
que amoenissimorum camporum cingit, & amplectitur,
ubertas; ex quibus larga omnium rerum copia, quae
ad humanam uitam uidentur pertinere, colligitur;
inter duas praecipue Italiae prouincias. Galliam Cisal-
pinam, & Flaminiam; ea in gyrum soli magnitudine,
quae maximas quasque Ciuitates aequet; populo-
rum,

rum frequentia, & incolarum copia, substructionum, & aedium, magnificentia, templorum quoque ornatissimorum amplitudine, cohonestata: addo Scholarum, & Academiae, pulchritudinem, & pulcherrima, ad pauperum subleuandam inopiam, hospitia, summa cum pietate coniuncta, ita omnibus rebus, ad illorum usum necessarijs, instructa, atque parata, ut nulli in Europae finibus Ciuitati, quamuis opulentissimae, concedat. in aedium uero priuatarum collocatione, & in porticum serie, sub quarum latissimo, & amplo, spatio, per uniuersam Ciuitatem, uelut intra domesticos parietes, discurretur, nulla profecto, neque in Italia, neque alibi usquam, reperiri potest, quae huic nobilissimae conferri, nedum anteponi, posse uideatur. Sed haec, etsi magna per se sint, sunt illi tamen cum ceteris communia: quod his bonis omnes fere Ciuitates, inter se, nulla sint alia, nisi quantitatis, ratione distinctae, cum alia magis, alia minus, iidem sit rebus ornata. Atque ideo has Ego non recensendas, sed breuiter dicendo perstringendas, putauit, ut ad eas properarem, quas iam dudum commemorare cupio, quaeq. magis ad laudem pertinere uidentur, & maiorem mihi segetem orationis proponunt. Cum trita bonorum partitione uti possimus: quaeq. iam commemorauimus, e fortuna pendere constet; quae uero deinceps enumerabuntur, animi esse appareat. Illa igitur, quae huius Urbis arbitror esse propria bona, & sua, quasi munera; quorum in partem nulla uenit alia; sunt, ciuilibus maxime, summa cum honestate, cultus, & singularis, in uiuendi consuetudine, urbanitas, facilitas, humanitas, morum suauitas, & politissimi, liberalissimique, mores, non solum in ijs, qui nobilitate excellunt, uerum etiam mediocrium, & ipsius plebis: cum fere nemo sit, quin, pro rerum natura, & in loquendo, & in agendo, ita se gerat, ut amabilissimos mores, seq. humanissimum, probet, & cum patrio Caelo simul hautam suauitatem, & animi moderationem, praestet. hoc enim quasi humanitatis lacte educantur animi in hac Vrbe, mutuaq. inter se consuetudinem tuentur, societatemq. conseruant: ne
que

que tamen cum aduenis hanc contrahunt liberalitatem ;
 immo magis exstat, seseq. latius ad illorum commoda
 Bononiensum porrigit, atque explicat, humanitas. ho-
 spitalitatis, & omni beneficentiae genere erga hospites
 suos omnem & spem, & expectationem, plane uincunt.
 tanto illos studio, tanta hilaritate, excipiunt, & ample-
 xantur. Quicumque Bononiam diuertit, statim non so-
 lum amicos, sed prope fratres amantissimos, & plus quam
 credi potest, officiosos comparat, qui nihil omnino prae-
 termittunt, quod ad eum honorifice excipiendum, atque
 ornandum, faciat : ut dies noctesq. nihil aliud, nisi ut
 de suis hospitibus benemereri possint, & agere, & cogita-
 re, uideantur. Hinc fit, ut plurimi, tanta allekti morum
 facilitate, & liberalitate, plerumque in hac Vrbe diutius
 commorentur : atque, hinc digressi, quocumque pro-
 ficiscuntur, Bononiensium summam, & singularem, huma-
 nitatem commemorent, summaq. cum laude celebrantes
 praedicent. Et, cum animos nostros nihil magis, quam
 uiuum non simulatae probitatis exemplar, inflammet, &
 ad imitationis studium impellat, illi quoque, domos suas
 reuersi, honestissimo huius uirtutis studio flagrantes,
 retentosq. ex tantae liberalitatis lumine uelut ignicu-
 los excitantes, patriam quoque suam clarissimo tam
 egregiae uirtutis splendore collustrant. Quod qui fa-
 ciunt, sapienter mehercule faciunt. Nam, si tanto studio
 ceteri homines in externis gentibus, nouos uestimen-
 torum ritus, & cultus, nouas delicias, noua ornatus ge-
 nera, ad commoditatem, & luxum corporis tantummo-
 do, exquirunt, & domum, summo etiam cum impendio,
 reportant : quanto maiori ornandi laude sunt, qui hos
 mores colligunt, & pulcherrima uirtutum semina in suas
 Ciuitates inuehant, quibus non familiae solum, sed Ci-
 uitates, & Prouinciae, medius fidiis ornantur uniuersae.
 Roma ipsa, rerum pulcherrima, gentium domina, or-
 bis deliciae, a primis suis temporibus, & crescentis Impe-
 rij incunabulis, communis Patria existimata, & appellata,
 est ; quod fuerit semper in omnes benefica, & liberalis ;
 omnes dignitates, omnia iura Ciuitatis, & ordines, o-

B

mnibus

mnibus communicarit : nostroq. hoc saeculo , idem no-
 men , idem retinens institutum , gradus honorum beni-
 gne omnibus diuidit , qui uiam sibi , & aditum , uirtuti-
 bus ad illam muniunt. Eadem ratione , parum ue dissimili ,
 potest Bononia uocari *Patria communis* : tum , quod illi , qui
 se huc conferunt , amantissimos , eosdemq. carissimos ,
 ut diximus , amicos parant ; quod plerumque multi in
 Patria uix sunt assecuti : tum , quia ex illa , quasi commu-
 ni omnium altrice , atque parente , uniuersae Europae re-
 giones suauissimos mores hauriunt . merito igitur hoc il-
 li nomen tribui potest , ut *Patria communis* appelletur ; ut
 cum altero , quo insignita est , pulcherrimo nomine con-
 iungatur , *Parentis Studiorum* . hoc enim iam pridem conse-
 cuta est , cum , tot ab hinc saeculis , multa sua cum glo-
 ria , disciplinarum omnium , & artium , quae magni apud
 homines aestimantur , studia aluerit , & cadentem fere lit-
 terarum gloriam sustentarit . Sapientissimum profecto
 consilium , & mira Theodosij 11. Imp. prouidentia iure
 optimo celebratur , qui , cum mille abhinc centum an-
 nos florentissimam hanc Urbem instaurasset , non solum
 auxit , & ornauit aedificijs , & incolis , sed , amplissimis
 illi priuilegijs irrogatis , commune , & sempiternum , li-
 beralium disciplinarum hospitium esse uoluit , & uocauit
omnium scientiarum fontem , arcanorum suorum apiarium , perennem Stu-
dij sedem ; ac , si dixisset , poetice describens , nouum Par-
 nassum , atque Pindum . Neque hoc temere , aut repenti-
 no animi motu , sed maturo consilio , statuit , & plus ,
 quam biennio , ut ipse testatur , *captus comoditate , ac fer.ilitate ,*
loci : idq. in uniuerso Christianorum Concilio , cum a des-
 set Pontifex Caelestinus , cum duodecim Cardinales ,
 Archiepiscopi , & Episcopi , quamplurimi , innumerabi-
 lisq. Principum , Ducum , & Comitum , multitudo , cen-
 tumq. Senatores , in Romano Capitolio . Huic Diuinae
 Urbi , nostris profecto temporibus , tantum abest , ut ullam
 anteponendam putem , ut ne ullam quidem conferi posse
 contendam : ex ueteribus uero nullam fuisse magis simi-
 lem crediderim , quam celebres , atque doctas , Athe-
 nas , lumen , & ornamentum , Graeciae , in quibus om-
 nes

omnes liberales artes tãt opere uiguerũt, & celebratae sunt,
 & in quibus illi antiquitatis, & doctrinae, ratione uene-
 randi, Philosophi floruerunt, qui naturalium, atque diui-
 narum, rerũ cognitionem, & scientiam ita locupletarunt,
 quiq. tantum studij, & diligentiae, in ea re collocarunt,
 ut nobis praecepta, & quasi normam, praescripserint,
 qua adiuti, cum uirtute homines uersari, & morum prae-
 stantia eminere, possemus. Quorum adhuc exstat, uiget-
 que, memoria; scriptaq. eorum doctissima leguntur. Et,
 quantum assequi coniecturis optimis, & ratione, pos-
 sumus, ut Cicero quoque multis in locis testatur, (qui
 saepius *Atticum leporem* appellat) Atheniensium Ciuitatem
 optimis, & humanissimis, moribus fuisse credimus insti-
 tutam. Multos item exstitisse Atheniensium minime du-
 bitamus huiusmodi liberalitate praeditos; quamuis ce-
 terorum nomina, praeter Cimonis, Miltiadis filij, libera-
 litate insignis, tenebris, & obscuritate, uel temporum,
 uel scriptorum, iniuria, delitecant. illius enim domus
 semper omnibus patuit: neque cuiquam umquam, in
 quo praesertim aliqua uirtutis significatio appareret, ho-
 spitum denegatum accepimus: quiq. etiam, eadem li-
 beralitate adductus, uillas habuit, nullis muris, atque
 saepibus, munitas, ut omnium usui paterent. huic, qui ex
 manubijs hostibus ereptis, & spolijs e bello reportatis, di-
 tissimus fuit, multos alios fuisse similes Athenis credide-
 rim: quemadmodum hoc quoque, sine ulla dubitatio-
 ne, audeam affirmare, multos fuisse in hac Vrbe, & nunc
 etiam esse, Cimones, qui tam praeclara laude, & uirtute,
 excellant: quod, qui huc proficiscuntur, uel otij, uel ne-
 gotij, causa, experiendo magis fortasse re ipsa, quam ex
 litterarum monumentis addiscendo, facile cognoscunt.
 quae inquam Ciuitas in hoc quoque dignissima est, quae
 cum antiquissimis Athenis conferatur; quod, ab ultima
 paene hominum, & litterarum nostrarum, memoria, &
 praeclarissima ipsa tulit ingenia, & aliunde accersitos, ce-
 leberrimos, in omni disciplinarum genere, uiros, & in
 iuris potissimum cognitione, aliquando uel inuitis ijs,
 in quorum imperio erant, honestissimis condicionibus.

ex alienis fecit suos. Quorum praeclarissimorum studio-
rum causa, ut olim Athenas, sic nunc quoque ex omni-
bus gentibus ad hanc Urbem praestantissimorum adole-
scentum fit concursus; qui mox, domum reuertentes, po-
pulum gubernationi praeficiuntur, & ad res publicas
administrandas, ad leges instituendas, & ius dicendum,
publice aduocantur. Cuius rei praeclarum nobis exhi-
bent testimonium pulcherrima Hispaniae, & Galliae, Re-
gna, aliaeque. exterae Prouinciae, in primisq. Italia, &
illius caput, atque princeps, ROMA, in qua semper flo-
ruere, atque uersati sunt, uiri praestantissimi, Bononiae,
ueluti Musarum in sinu, educati. Multi etiam Bono-
nienses Ciues, altissimos dignitatum gradus sunt conse-
cuti: cum multi hinc exstiterint, & Rotae, ut aiunt, Au-
ditores, Episcopi, ut appellantur, multi, multi Cardi-
nales, & Romae moderatores, earumque Prouinciarum,
quae Romano, & Apostolico, parent Imperio; qui, tam-
quam prudentissimi Gubernatores, inter tot, tamque ua-
rias, procellas fluctuantem Petri Nauim rexere, & a sco-
pulum incursum, turbulentissimisq. tempestatibus, uin-
dicarunt. Quae hucusque, Diuino beneficio, singulari,
atque admirabili, GREGORII XIIII. Maximi Pontifi-
cis, prouidentia, & uigilantia, seruata, & recta est. De
cuius olim uirtutibus perpetuo non solum Bononia, Eius
felicissima Patria, sed uniuersa Italia, gloriabitur, nul-
la aetas, nulla memoria, conticescet. Huic, Summi Dei
pietas Sacrosanctae Christianae Religionis administra-
tionem tradiderat; & in puppi, ut clauum teneret, collo-
carat. Quod quidem munus, & cura, uniuersi scilicet
Orbis, & salutis hominum, sapientissimo, atque prae-
stantissimo, Illius animo digna fuit. Cuius Sanctissimae
cogitationes, atque consilia, non id solum felicitatis
afsecutae uidentur esse, ut nobis, qui uiuimus, Eumque
praesentem intuiti sumus, atque spectauimus, pacem, at-
que salutem, attulerint; sed hac quoque gloria cumu-
labuntur, ut tanti Pontificis memoria, atque exemplum,
cum in posteriorum Pontificum animis infederit, idem
gloriae studium excitet; eundem securitatis publicae fru-
ctum

Etum pariat ; eandem denique Populi omnes, qui longissimo interuallo nos consequentur, ex Eius Sanctissimis institutis, ad uniuersum Orbem, salutem, ac quietem, in omnem posteritatem redundare fateantur. Quemadmodum enim caelestes globi, atque Sidera, eosdem caeli repetentes amfractus, eosdem etiam euentus terris dicuntur impartire ; ita, perdurante, numquam intermoritura, memoria, Diuinae huius Pontificis uirtutis, in Eius Successoribus, Christiana Resp. eodem pacto, perpetua felicitate, & continenti secundarum rerum cursu, perfruetur. Iamq. multi praeclari obseruatores, & imitatores, Sanctissimarum Illius rerum praeclarissime gestarum, praeclaro animo ad uerum decus, unde Illius apparent Sanctissimis Pedibus impressa uestigia, properant. Te igitur, GREGORIO. XIII, singulare Bononiae, Romae, Italiae, atque Europae, ornamentum, Te nunc, inquam, quem nobis dudum acerbus, & immaturus, obitus eripuit, Tibi fortasse maturus, satis enim uixeras uel aetati, uel gloriae, inter beatos illos animos relatum, appello. ut, eo studio, quo Ipse a summo Deo, quasi debito tuis uirtutibus praemio, fuisti ornatus, Tuis factis immortalibus, immortalis memoria dignis, ex Tua sapientissima consuetudine, constans, me, huic quae Te genuit, Vrbi dicatum, quem in Tuam fidem, atque clientelam, uiuens acceperas, nunc, inter superos receptus, caelitus respicias, atque Tuo patrocinio, praesentiae Tuae, & studij, spe destitutum, adiuues. Nec uero, cur de hoc dubitem, ullam causam esse uideo. Is enim Tibi iam a summo Deo, Tuis etiam precibus, suffectus est orbi regendo Pater, quem Tibi, in eo gubernando, non dissimilem fore, in Eius praeteritam uitam intuentes, certo confidimus. Sistet enim SISTVS Ecclesiam : nec iacta a Te, ad Catholicae Religionis cultum, & incrementum, fundamenta imperfecta esse sinet : sed, Tuis, & proprijs etiam, insistens uestigijs, opus perpoliet. Faxit igitur Deus, ut, quae iam animo praeclara Ipsum designasse intelligimus, ad optatum finem possit perducere. Ego certe, si mihi ad eum diem spiritum ducere contigerit, tunc me felicem prorsus putabo. Quod

ut

ut certo futurum speramus, ita breui ut nobis, ad uni-
 uersae Christianae Reip. quae antiquissima rerum o-
 mnium nobis esse debet, gloriam, ac dignitatem, contin-
 gat, ab omnipotenti Deo, enixe admodum, & humi-
 liter, petimus. ut, quae multis aerumnis, no-
 stra culpa, & scelere, contractis, af-
 fligitur, singulari Eius San-
 ctitatis uirae mu-
 nerere cre-
 tur.

BONONIAE, Apud Alexandrum Benacium.

CIO IO XXCV

Curiae Archiepisc. & Inquisit. concessu.



005266438

duni.
um o.
ontia.
mi.
a.

cium.

Th.

